

擒石達開有功，賞二品銜。管有賦乃、阿谷、蘇呷、咱戶、慕虐、阿蘇、濫田壩、普雄、黑保、大疏山十土目。以上越嶲廳越嶲營屬。

煖帶密土千戶，其先嶺安泰，康熙四十九年，歸附，授職。管有上官、六革、瓜保、糾米、布布、阿多六磨、磨卡爲呷、西糾七鄉總。

煖帶田壩土千戶，其先部則，康熙四十四年，歸附，授職。

松林地土千戶，其先王德洽，康熙四十九年，歸附，授職。管有老鴉漩、白石村、六翁、野豬塘、前後山、料林坪六土百戶。以上越嶲廳寧越營屬。

以上各土司，皆頒印信號紙。

木裏安撫司，其先六藏塗都，雍正七年，歸附。

瓜別安撫司，係麼麼夷人。其先玉珠迫，康熙四十九年，歸附。

馬喇副長官司，係僛夷人。其先阿世忠，康熙十九年，歸附，頒給號紙。

古柏樹土千戶，係麼麼夷人。其先郎俊位，康熙四十九年，歸附。管有阿撒、祿馬六槽

兩土目。

中所土千戶，係麼麼夷人。其先喇瑞麟，康熙四十九年，歸附。

左所土千戶，係麼麼夷人。其先喇世英，康熙四十九年，歸附。管有華苴蘆土目。

右所土千戶，係麼麼夷人。其先八璽，康熙四十九年，歸附。

前所土百戶，係麼麼夷人。其先阿成福，康熙四十九年，歸附。

後所土百戶，係麼麼夷人。其先白馬塔，康熙四十九年，歸附。以上鹽源縣會鹽營屬。

以上各土司，皆頒印信號紙。

酥州土千戶，其先姜喳。康熙四十九年，歸附，授職。

架州土百戶，其先里五，康熙四十九年，歸附，授職。

苗出土百戶，其先熱卽巴，康熙四十九年，歸附，授職。

大村土百戶，其先也四噶，康熙四十九年，歸附，授職。

糯白瓦土百戶，其先紐吽，康熙四十九年，歸附，授職。

大鹽井土百戶，其先布汪喳，康熙四十九年，歸附，授職。

熱卽哇土百戶，其先牙卓撒，康熙四十九年，歸附，授職。

中村土百戶，其先歪卽噶，康熙四十九年，歸附，授職。

三大枝土百戶，其先甲噶，康熙四十九年，歸附，授職。

河西土百戶，其先那姑，康熙四十九年，歸附，授職。以上冕寧縣冕山營屬。

窩卜土百戶，其先藍布甲噶，康熙四十九年，歸附，授職。